



國家圖書館藏 古籍題跋叢刊

國家圖書館 / 編

GUO JIA TU SHU GUAN CANG
GU JI TI BA CONG KAN

第8冊



北京圖書館出版社

國家圖書館藏古籍題跋叢刊

第8冊

北京圖書館出版社

第八冊目錄

莫圃藏書題識卷八至卷十補遺一卷	一
莫圃刻書題識	三四七
莫圃藏書題識續錄	四〇三
士禮居藏書題跋記續編卷一至卷三	六六一

蕘圃藏書題識卷八

集類二

乖崖先生文集十二卷附錄一卷

朱本

自右見卮史以下從舊鈔本補鈔本已於壬戌春攜贈蜀人張船山太史同年矣蕘翁記

王黃州小畜集六十二卷

校宋舊鈔本

余得宋刻補鈔本王黃州小畜集適挈眷赴杭舟中攜以破寂手爲校勘道光元年三月七日蕘圃記是本鈔手亦舊分爲六十二卷不知何本內有注一作某者往往與宋刻本合然字句閒亦偶有羨者決非一本矣此校本未能悉照宋刻面目如卷端之總目每卷之子目未及一一更正聊記梗概而已補鈔亦據照錄宋本寫入時有筆誤茲亦校其與此鈔異

者四月十日又記

均在卷首序後

是本向有舊人校字用片紙黏於每字之旁脫落過半茲就其有者表於拙校之前無可附麗者仍夾入卷內有一夾籤亦存之蕘夫

余少時得元之詩文數篇讀而善之銳欲見其全集徧覓不可得既知有板梓於黃州託其州人覓之又不得去歲入長安從相國葉進卿先生借得內府鈔宋本疾讀數過甚快因鈔而藏之今學爲詩者未能窺見此老藩籬而動彈射宋人至不遺餘力此與以耳食者何以異悲夫萬_曆庚戌三月望日晉安後學謝肇淛敬跋

汲古閣祕本書目王黃州小畜集三十卷八本影宋板鈔本十八卷別葉有東澗朱筆字二十三卷有趙清常題識又有東澗朱筆字在副葉記二十五二十

六二十七文章

四兩入錢

讀書敏求記王黃州小畜

集三十卷黃州契勘小畜集文章典雅有益後學

本計一十六萬三千八百四十八字紹興十七年申

明雕造開板之不苟如此是本後有嘉靖乙丑岳西

道人復初跋語藏於栩栩齋

楊紹和案謝跋及毛錢云云均復翁記於簡末

者

小畜集三十卷

補鈔宋本

去冬聞坊友傳言云有宋刻王黃州小畜集流傳郡
中既而遇諸冷攤果宋刻其缺者皆吾研齋補鈔不
知誰何也未有謝肇淛跋亦未知果爲其手跡抑係
傳錄存之物主居奇議直未能收得目雖遇心未忘
頃又念及遂重索觀見卷中遇留字皆缺最後一畫
以呂無黨手鈔他書證之寫留字作留疑出呂氏鈔
也余家藏有鈔本硬分三十卷爲六十二以沈虞卿

或

二

後序居前失去前之自序并無後之牒文官銜則鈔本之不如宋刻遠甚明代並無刊本故傳錄亦鮮昔漁洋山人曾見估人攜來一本卒以未得爲憾余故勉力購此全書四百餘葉宋刻居三之一古色古香不礙爲斷珪殘璧交易旣成書友云徧示郡中諸收藏家未識此書何以尊貴都不欲收今君得此如護頭目請問其詳余應之曰書必宋刻方敢信宋刻雖不全據謝跋知鈔補亦出宋本前人斷不誑語略取舊藏鈔本對勘字句實有勝處豈以鈔補爲瑕之掩瑜耶宋刻本有野竹家吳郡沈文沈辨之各印鈔補本有惠氏小紅豆兩方印明與國朝是書舊在吾郡人弓人得欣幸何如其餘恥齋光輪等印皆不可考矣俟與吾研齋名徐訪之道光紀元之三月三日又爲寒食堯翁燒燭書

書前跋畢復檢汲古閣書目知所藏係影宋鈔本以有東澗及趙清常筆跡故表之則余今所得本有沈辨之及惠定宇諸家印者不亦當珍重耶至於宋刻之有三分之一又堪以傲汲古閣矣附記一笑龔夫余信此書爲呂無黨手鈔以他書證之始知之其板心吾研齋補鈔向未知此齋爲何人齋名後晤江鐵君舉此問之爲余言其詳乃知卽無黨之齋名也因有吾研齋小照故知之復舉卷中光輪恥齋等印詢之云光輪乃晚村原名恥齋似亦其號也已所不知而人知之學之所以貴乎問也後生輩宜三復斯言四月十日復記

余旣得此宋刻補鈔本因手校一過余向所藏鈔本注一本作某者往往與宋刻合而余友收得吳校庵校鈔本在乾隆二年晉中刻本上其行款與宋刻同

云亦出宋刻惜更謬誤當是刻時妄改耳吳校所舉鈔本云出自盧召弓亦未必盡可據也余友有張君訥庵者嘗校書甚精審復借此本去校還書札云補鈔卷中亦有脫衍譌字惜鈔之者未精詳也人苦不知足得見宋刻殘本又惜其不完爲遺恨不知天壤閒尙有完本存留否耶染削二字簽出在第七冊賸啟中似作濡毫筆削之意疑與本事不合王元之引用書典頗有誤處枚庵校本已駁正兩條恐不止於此也云云我輩鈔書苦心同此愛惜近日故交零落講究藏書者絕無其人訥庵幾爲碩果之存故載其言以寄慨云端午日閒窗蕘夫識

西湖林和靖先生詩集四卷

校宋本

此集爲匏庵相國所藏標題尙公手跡也嘉靖戊申春友人禮部陸君子傳購得之閒以遺余其雅意不

敢當漫識卷末隆池山樵彭年書於寒綠堂

林和靖先生詩集余向於郡故藏書家得一鈔本云

是顧云美手鈔已珍藏之矣後海鹽友人攜一刻本

來取校鈔本字句之間實多是正於鈔本外增多七

言律詩六首

鍾略秀才以七言四韻傳為奇軀敢酬和惟采覽壽陽城南寫望懷歷陽故友

至梁峽口懷朱嚴從事之官嶺外兩夕次於此西梁山下泊船懷潤州果上人春日懷歷陽後園遊兼寄

宣城天使松思齊上人洵善本也物主需直四金余因其書尚

是明刻未必有此重價姑置之今夏六月陶五柳主

人覲一舊本於余前豔稱之曰此書在買骨董人沈

鴻紹處非貴直不售也且末有彭隆池跋沈益珍之

屬五柳主人代購越日以書來展卷視之古色黝然

此本紙白而字大與海鹽本之紙黃而字小迥異然

其為明刻則同復取以校鈔本則海鹽本是正之處

都與此刻合而七律中又增多一首

和酬泉南陳其賢良高見贈其

餘如閔師見寫云云已下三首鈔本在卷一後而此
在補遺中病中二首鈔本在卷二後而此在卷三中
是所據本異也顧鈔本又卷首多序一首補遺中多
題草詞一首此皆無之序或脫落而詞或詩集所本
無特後人掇拾所存耳再鈔本卷一末有小注云有
佳句云草泥行郭索雲木叫鉤輶考失全篇十八字
更足以見鈔本所自大抵傳錄之本不及此刻本之
可信矣刻本有紹興時人題識其來當有原委素稔
故人顧抱冲有殘宋本擬從其弟東京借來一爲校
勘云嘉慶丁巳閏六月朔日書於讀未見書齋黃丕
烈

閏六月三日東京以其仲氏遺書慨然見借余於四
日竭一日之力校畢惜宋本殘缺不全已遭剗補惟
梅序完好餘詩三十一葉首題曰和靖先生詩集上

次行空二格標目古詩列五言四首後接律詩標目以後五言七言不復分體共約一百五十餘首雖非完璧其所有者勝於此刻多矣予檢宋史藝文志稱林逋詩七卷又詩二卷文獻通考則云林和靖詩三卷西湖紀逸一卷今宋本卷首及版心皆云和靖先生詩集上上字係修改者其下半一畫尙係原刻字痕其爲一爲二爲三未敢定也姑著所疑於此蕘圃殘宋本後有吾家子羽跋備述源流并著殘缺獨存之故天下佳物原不必完善而始獲珍祕然能賞識者世有幾人不隨所藏之書而盡散者正以不知已而始獲知已也予於林集搜訪幾年卽有名鈔舊刻總非本書面目今見宋刻雖曰殘缺然以古詩律詩分體而五言七言不復分析皆是古人編集舊例存此亦庶幾見古意爾丕烈

殘宋本余屬塾師顧澗蘋影摹一本藏諸士禮居中

可與此本相參考云堯圃

均在未卷後

和靖先生詩集不分卷

影宋精鈔本

和靖集余向購之於武林徐門子鋪中後歸靈均靈均身後藏書散盡此冊以殘缺獨存戊子夏趙昭攜過涇上因復留之如異鄉見故人也攝六黃翼

林和靖先生詩僅見明刻本四卷者為最古

余所藏為姚江

陳贊編次本盧抱經羣書拾補云明正統八年故

餘姚陳贊惟成刻本則余所藏即明正統本

顧抱沖有殘宋本實希世珍也今夏從抱沖弟東京借歸手校其異同於明本上覺宋刻之妙雖殘缺而獲益滋多適抱沖從弟澗蘋為余家塾師謂余曰此種書世不多有當錄一副本存諸士禮居中未始非為此書廣其傳也且抱沖已故其書不常寓目今得副本展玩不如見故人耶余感其言即倩澗蘋用舊

紙手自影摹自題籤至跋語共三十四葉與抱沖本無纖毫之異恐汲古精鈔無以過是矣宋刻和靖先生詩下俱有上字似割補而描寫者其每葉排次數目亦非本真故均未寫入余案文獻通考云林和靖詩三卷今宋刻上字係修改然下一畫尙係原刻其爲一爲二爲三俱未可知故并著其原委以告後之讀是書者嘉慶歲在丁巳季秋月四日黃丕烈書於讀未見書齋

嘉慶丁卯夏四月二十有八日偶檢及此其去鈔書之日已歷十載矣回憶抱沖之歿在丁巳四月近因其弟東京徙居往賀焉抱沖之長子阿和出見嶄然頭角已成人問其遺書尙扃閉櫥中今其子年漸長庶幾能讀父書乎而余以父執老友或可藉寓目亦未可知書此誌喜復翁

均在冊末

林和靖集四卷

宋刻本

此故人顧抱冲遺書也抱冲在日未及請觀今夏閒
得一陳贇刻本因從其弟東京借歸讐勘余愛其楮
墨精妙刻鏤分明雖非完書亦是祕本遂屬伊從弟
澗蘋影摹一本留諸士禮居中以爲見書如見故人
也還書之日聊附數語於尾藉以明余之不欺死友
云嘉慶二年丁巳秋重陽後三日蕘圃黃丕烈識

鉅鹿東觀集十卷

宋刊本

此宋刻鉅鹿東觀集余友顧抱冲得諸郡城華陽橋
顧聽玉家真希世珍也偶檢陸其清佳趣堂書目知
其清藏有元刻玉山雅集構李曹秋岳侍郎聞之擬
購去而其清未之許秋岳遂折節訂交以宋梓魏仲
先鉅鹿東觀集孫奕示兒編相贈古人惓惓愛書之
意迄今猶可想見余始疑抱冲所藏或是其清故物

今從抱沖假歸開卷有曹溶私印檇李曹氏收藏圖書記方信此書卽曹所贈陸者也且玉山雅集見藏聽玉處則此書之同出於陸氏無疑特未識示兒編又散落何處耳抱沖愛書好古所藏示兒編有吳方山舊藏鈔本其去宋刻當不遠魏仲先集已爲所得何不并玉山雅集而歸之以還平原舊觀乎抱沖聞之當亦以余言爲不謬也乾隆乙卯冬季借魏集校畢還書之日因記數語於卷尾餘紙云棘人黃丕烈

鉅鹿東觀集十卷

鈔本

余向於顧抱沖處見有宋刻魏野鉅鹿東觀集擬假錄而苦無鈔胥可以任其事者遂未之假今茲冬仲晦日偶至郡廟前五柳書居案頭有鈔本鉅鹿東觀集云是收來者因得之鈔手不甚俗惜紙皺難以展讀命工重裝而假抱沖宋刻本對勘一過訛字賴正

頗多宋刻闕四五六卷係鈔補未知與宋刻合否亦一憾也宋刻本爲曹潔躬物後以貽我郡陸其清此見諸陸其清收藏書目今抱冲得於東城華陽橋顧聽玉家蓋古書源流固不可沒云乾隆乙卯十二月中澣三日棘人黃丕烈

武溪集二十卷

明成化本

明刻黑口宋人集世以爲珍余武溪集向曾置一部係黃紙者質麤而墨氣淡茲書友攜此來居然勝一籌矣命工重爲易其面餘仍舊也堯翁甲子十月十有三日

尹河南集九卷附錄一卷

校舊鈔本

以上九卷并附錄一卷亦傳青芝山堂本與舊鈔同出一手故差誤特多茲用盧學士本校定之時戊戌冬至後二日漫士